

ATXILOTUAK. Bi lagun horiek asteartean atxilotu zituzten Madrilen atentatua izan ostean

Garcia eta Egues espetxeratu dituzte inkomunikatuta deklaratu ondoren

Eguese uko egin zion epailearen aurrean deklaratzeari, baina hamar hilketara egotzi dizkiote

Agentziak | MADRIL

Carlos Divar Espainiako Entzutegi Nazionalako epaileak atzo eguerdian hartu zien deklarazioa asteartean Madrilen atxilotu zituzten Aitor Garcia Aliaga eta Ana Belen Eguesi. Asteartean Madrilen atentatua gertatu ondoren atxilotu zituen Espainiako Poliziak bi lagun horiek eta ETaren *Madril komando*-ko kide zat jo ditu. Geroztik Madrilen eta Salamancan zenbait etxebizitza miatu eta dokumentazioa eta armak aurkitu zituzten, besteak beste.

Atxilotuak inkomunikatuta egon dira Poliziaren eskuetan, eta atzo ere inkomunikatuta deklaratu zuten. Aitor Garcia Aliaga izan zen Divarren aurretik pasatu zen lehena. Epaileak eginbideak sekretu izendatu ditu, baina hala ere berri agentziek deklarazioari buruzko zenbait datu kaleratu zituzten iturri juridikoak aipatuz. Horien arabera Garcia Aliagak onartu zuen *Madril komando*-ko kide zela apirilaz geroztik. Zenbait ekintza armatutan parte hartu izana onartu zuen Garcia, berriz aipatu iturrien arabera, tartean Madrilen bonba-autoz eginiko bost atentatutan.

Erakunde armatuko kide izatea, kalte terroristak, armak eta lehergaiak izatea, agiriak faltsutzea eta lapurreta egotzi zion



Atxilotuak ostean miatutako etxeetan aurkitutako materiala.

fiskalak, eta kartzelatzeko eskatu zuen. Garcia Aliagaren deklarazioak bi ordu iraun zituen.

Haren ondotik, Ana Belen Egues eraman zuten epailearen aurrera, eta uko egin zion deklaratzeari. Poliziaren arabera Egues 1999tik zen *Madril komando*-ko kidea, eta komando horrek eginiko atentatu guztietan hartu du parte. Fiskalak hamar hilketara eta hiru saialdi leporatu zizkion besteak beste. Ho-

rretaz gain, erakunde armatuko kide izatea, armak eta lehergaiak gordetzea, autoak lapurtzea eta agiriak faltsutzea egotzi zion. Epaileak biak espetxeratzeari erabaki zuen. Haien egotzari buruz ez zen berririk kaleratu atzo.

Atxilotuak inkomunikatuta egon diren egunetan ere zenbait informazio kaleratu dira us-tez pertsona horiekin batera *Madril komando*a osatzen zute-

nei buruz. Jon Rubenach, Lexuri Gallastegi eta Manex Zubia-garen izenak aipatu ditu Poliziak. Salamancan, Garcia eta Eguesez gain, Rubenach eta izenik eman ez duten laugarren bat bizi izan direla kaleratu zen atzo. Halaber, Rubenach asteartean Salamancako etxean zegoela adierazi du Poliziak, eta atxilotuak berri izatean taxi batean ihes egin zuela Valladolid aldera.

Ertzaintzak ez du baieztatu Getxoko ustezko atentatu egileak identifikatu dituenik

Efe | MADRIL-BILBO

Segurtasun Indarrek Jose Maria Lidon magistratuaren aurkako atentatuaren ustezko egileak identifikatu dituztela zabaldu zuen atzo Efe berri agentziak, ikerketako iturriak aipatuta. Hiru pertsonaren izenak eta haien inguruko zehaztapenak ere eman zituen: Kemen Uranga ondarroarra, Mikel Garikoitz Azpiazu bilbotarra eta Kristina Goirizelaia arrasatearra. Iturri horien arabera, Uranga eta Azpiazu dirateke Bizkaiko Probintzia Auzitegiko magistratuari tiro egin ziotenak, eta Goirizelaia ihes egiten lagundu zien.

Kemen Uranga eta Kristina Goirizelaia ETako liberatutzat jotzen ditu informazio horrek, eta ETaren *Bizkaia komando* berregituratutako kide zat. Eta Mikel Azpiazu hainbat kale erasorekin lotua zutela eranstu du.

Eusko Jaurlaritzako Herri-zaingo Sailak, hala ere, Jose Maria Lidonen ustezko hiltzailerik identifikatu duenik ez zuten ez baieztatu, ez ezeztatu. Getxoko atentatuaren inguruko ikerketa Ertzaintzak daramala nabarmendu zuen Herri-zaingo Sailak, eta erantsi zuen horren inguruko datuak ez dutela emango, polizilana ez eragotzeko.

Telletxea, Sasiain eta Iñigo espetxeratu egin dituzte La Santeko kartzelan

Erredakzioa | DONOSTIA

Laurent Le Vert epaileak Iñaki Telletxea Goñi, Antxon Sasiain eta Carlos Iñigo Blasco espetxeratzeko agindu zuen ostiral gauean. Iñaki Telletxea Goñi astelehenean atxilotu zuten Narbona ondoko herri batean, eta beste bi atxilotuak horrekin lotuta daudela adierazi zuten polizi iturriek.

Sasiain eta Iñigo ostiral goizean atxilotu zituzten Bezieren. Hasiera batean nahasmena sortu zen atxilotuak izenen inguruan, eta Antxon Sasiain Rodriguez Jesus Luis Perez Ramos zela kaleratu

zen. Telletxea Goñi eta ostira-lean atxilotutako beste biak ostira-lean pasatu ziren epailearen aurretik, eta hirurak La Santeko kartzelan sartzeko agindu zuen.

Gaiztagin taldeko kide izatea eta legez kanpo armak izatea egotzi diete hiru lagun horiei. Sasiaineri agiri faltsuak izatea ere egotzi diote.

Atzo zenbait mobilizazio egin zituzten atxilotuen herrietan. Bergaran, Sasiainen herrian, manifestazioa egin zuten 19:00etan eta 150 lagun elkartu ziren bertan. Irunen ere, Telletxea aska dezaten eskatu zuten iluntzean eginitako manifestazio batean.

EUROPA

Eskualdeetako presidenteen bilkuran ariko da Ibarretxe Liejan, ostegunean

Agentziak | GASTEIZ

Juan Jose Ibarretxe EAEko lehendakariak Europako erregioen lehendakarien bileran parte hartuko du azaroaren 15ean eta 16an egingo diren jardunaldietan. Konferentzia Liejan (Belgika) izango da, eta lege eskuduntzak dituzten eskualdeen bigarren konferentzia izango da, Lehendakariaren iturriek Efe agentziari jakinarazi diotenez.

Bileran Europa osoko eskualdeek hartuko dute parte, ez bakarrik Europako Batasunekoek. Bilkura Europako Kontseiluak antolatzen du, eta urtero bilkura berezi bat egitea hitzartu zuten. Lehena Bartzelonan egin zuten, iaz. Orduan ere lehendakariak parte hartu zuen.

Aurten Waloniak antolatuko ditu jardunaldiak. Azaroaren 15ean irekierako konferentzia izango da, eta haren ostean Ibarretxe hitz egingo du.

Lan jardunaldien ostean galazko afari bat izango da Palais des Princes Eveques jauregian. Guy Verhofstadt Belgikako lehen ministroa bertan izango da. Jardunaldiak ostira-lean amaituko dira Jean Claude Van Calwenbroughe Waloniako lehendakariarekin.

ESPAINIA-FRANTZIA

Chiracek Aznarri: «Inoiz baino batuago gaude»

Agentziak | BILBO

«Terrorismoaren aurkako borrokan» Frantzia eta Espainia «inoiz baino batuago» daudela adierazi zion Jacques Chirac Frantziako estatuburuak Jose Maria Aznar Espainiako gobernuburuari, aste honetako bi atentatuak gaitzesteko igorritako gutunean.

«Frantziaren elkartasunarekin eta lankidetzarekin baliatzen jarraitu dezakezu», adierazi zion Chiracek Aznarri, asteazkenean bidalitako eskutitzean.